



Lia Rumantscha

Cuera, ils 27 d'avrel 2017

### **Communicaziun allas medias**

#### **Carrussel, carrussel ni digl affon che viveva sin ina plonta**

In cudisch da canzuns da Flavio Bundi e Roman Weishaupt

**Il Chor d'affons Surselva ha festivau igl onn vargau siu 10avel anniversari cun in teater musical creaus aposta per quei giubileum. La Lia Rumantscha ha uss ediu las canzuns dil musical sut il tetel «Carrussel, carrussel ni digl affon che viveva sin ina plonta». Il cudisch cun disc cumpact cuntegn dudisch canzuns cun accumpignament da clavazin e cuortas historias leutier. La vernissascha cun participaziun dil Chor d'affons Surselva ha liug ils 7 da matg 2017 allas 16.00 en la fermata a Falera.**

«Carrussel, carrussel – ni digl affon che viveva sin ina plonta» meina el mund magic e fabulus dall'affonza. Tut fideivla al motto «Cun ils affons – per ils affons» ha Rilana Cadruvi, musicista e dirigenta dil Chor d'affons Surselva, rimnau patratgs, siemis ed ideas dallas cantaduras e dils cantadurs giuvens duront ed agl ur dallas improvas cun il chor. Il cumponist Flavio Bundi ed igl autur Roman Weishaupt han seschau inspirar da quei scazi imaginativ affonil e raquentan en in lungatg plein poesia dallas fantasias, dils plaschers e dallas temas dils affons.

Il cudisch cuntegn dudisch canzuns en pliras vuschs ed in rap – cun ina cuorta instrucziun d'in rappader professional – sco era ils accumpignaments per clavazin ed ils accords per ghitarra. El vegn cumpletaus d'in disc cumpact cun ina registraziun dil Chor d'affons Surselva ed ina versiun instrumentala ch'ins sa duvra sco musica accumpignonta.

La Lia Rumantscha ha ediu l'ovra ed envida alla vernissascha cun participaziun dil Chor d'affons Surselva. L'occurrenza ha liug ils 7 da matg 2017 allas 16.00 en la fermata a Falera. L'entrada ei libra.

Il cudisch cun disc cumpact cuosta CHF 39.00 e sa vegnir cumpraus sut [liarumantscha.ch](http://liarumantscha.ch), per telefon 081 258 32 22 ni ellas librarías da Vossa regiun.